

Bahan asal dari Arkib
Negara Malaysia

PM rasmi simposium simpanan sendiri hari ini

KUALA LUMPUR, Ahad - Perdana Menteri, Datuk Seri Dr. Mahathir Mohamad akan merasmikan simposium antarabangsa kedua mengenai menggerakkan simpanan sendiri di negara-negara membangun di sini esok.

Pengurus Besar Bank Simpanan Nasional, Encik Zainuddin Haji Bachik memberitahu, simposium seminggu itu akan dihadiri oleh 80 peserta dari 40 negara.

Simposium itu dianjurkan oleh Bangsa-bangsa Bersatu dengan kerjasama Institut Bank Simpanan Antarabangsa, Persekutuan Bank Simpanan Sweden, Lembaga Kemajuan Antarabangsa Sweden dan Bank Simpanan Nasional Malaysia.

Beliau berkata, simposium itu adalah bahagian kedua dari tiga siri. Siri pertama diadakan di Kingston, Jamaica dari 4 hingga 9 Februari tahun lalu.

Tumpuan

Antara lain, simposium itu akan mengadakan forum khas bagi membincangkan beberapa perkara dasar dan cara-cara peningkatan dan mobilisasi simpanan sendiri di negara-negara sedang membangun.

Forum itu akan memberikan tumpuan utama terhadap arahan ekonomi antarabangsa yang baru dan tahun perkembangan Bangsa-bangsa Bersatu yang ketiga.

Tajuk-tajuk yang bakal dibincangkan termasuk peranan mobilisasi institusi simpanan dalam pergerakan tabung bagi memberikan kredit kepada petani dan usahawan kecil.